

牧

津

牧津卷之四十二目

詰盜

張

敞

二見

尹

賓

王敬則

韓

夢

司馬悅

彭城王高澄

符融

蘇無名

刁雙

楊津

張鷟

張壽

柳慶

王瓌

韓琦

六見

昆補之

曾鞏

三見

范純粹

高防

蒲宗孟

尹伊

李常

許宗裔

劉皓

陳襄

胡長儒

歐陽穎

任伯雨

孫德淵

楊告

張繪

金武都

陳文偉

錢藻

黃琛

王恕

萬觀

戴金

王愷

李渭

卷之四

目錄

一

牧津卷之四十二 詰盜

明山陰祁承燦輯

張敞

張敞爲膠東相，自謂治劇郡，非賞罰無以勸善懲惡。吏遺捕有功效者，願得一切比三輔尤異。天子許之。敞到膠東，明設購賞，開羣盜令相捕。斬除罪吏，追捕有功，上名尚書，調補縣令者數十人。由是盜賊解散，傳相捕斬，吏民歛然。國中遂平。遷守京兆尹。京兆自廣漢誅後，比更守尹。

如霸等數人皆不稱職京師寢廢長安偷盜尤多百賈苦之上以問敞敞以爲可禁敞既視事求問長安父老偷盜囚長數人居皆溫厚出從童騎問里以爲長者敞皆召見責問因貰其罪把其宿負令致諸偷以自贖偷長曰今一旦召詣府恐諸偷驚駭願一切受署敞皆以爲吏遣歸休置酒小偷悉來賀且飲醉偷長以赭汗其衣裙吏坐閭里閱出者汗赭輒收縛之一日捕得數百人窮治所犯或一人百餘發盡行法罰

繇是枹鼓稀鳴市無偷盜天子嘉之敝爲人敏  
疾賞罰分明見惡輒取時時越法縱舍有足大  
者其治京兆略循趙廣漢之跡方略耳目發伏  
禁姦不如廣漢然敝本治春秋以經術自負其  
政頗雜儒雅往往表賢顯善不醇用誅罰以此  
能自全竟免於刑戮京兆典京師長安中沽穰  
於三輔尤爲劇郡國二千石以高第入守及爲  
真久者不過三二年近者數月一歲輒毀傷失  
名以罪過罷惟廣漢及敝爲久任職敝爲京兆



卷十二  
朝廷每有大議引古今處便宜公卿皆服天子數從之。

以盜治盜此古今第一法○政惟頗雜儒雅便能動引古今以定大議治理故當以經術勝。

### 尹賞

尹賞以郡吏察廉爲樓煩長舉茂材栗邑令左馮翊薛宣奏賞能治劇徙爲頻陽坐殘賊免後以御史舉爲鄭令時北地大豪浩高等報怨殺

義渠長妻子六人往來長安中丞相御史遣掾  
求逐黨與詔書召捕久之廼得長安中姦猾浸  
多閭里少年群輩殺吏受賕報仇相與探丸爲  
彈得赤丸者斫武吏得黑丸者斫文吏白者主  
治喪城中薄暮塵起剽掠行者死傷橫道枹鼓  
不絕賞以三輔高第選守長安令得壹切便宜  
從事賞至修治長安獄穿地方深各數丈致令  
辟爲郭以大石覆其口名爲虎穴乃召部曹掾  
史鄉吏亭長里正父老五人雜舉長安中輕薄

少年惡子、無市籍商販作務、而鮮衣凶服、被鎧  
扞持刀兵者、悉記籍之、得數百人、賞一朝會、長  
安吏車數百兩、分行收捕、皆劾以爲通行飲食  
群盜、賞親閱、見十置一、其餘盡以次內虎穴中  
賞所置、皆其魁宿、或故吏善家子、失計隨輕黠  
願自改者、財數十百人、皆贖其罪、詭令立功以  
自贖、盡力有效者、因親用之、爲爪牙、追捕甚精  
甘耆姦惡甚於凡吏、賞視事數月、盜賊止、郡國  
亡命散走、各各歸其處、不敢闕、長安江湖中多

盜賊以賞爲江夏太守捕格江賊及所誅吏民甚多坐殘賊免南山群盜起以賞爲右輔都尉遷執金吾督大姦猾三輔吏民甚畏之數年卒官疾病且歿戒其諸子曰丈夫爲吏正坐殘賊免追思其功效則復進用矣一坐軟弱不勝任免終身廢棄無有赦時其羞辱甚於貪汙坐臧慎母然賞四子皆至郡守長子立爲京兆尹皆尚威嚴有治辨名

尹賞所爲雖曰殘刻然除暴絕奸明目張

膽直截易曉與他酷吏鍛鍊周內者不同。  
○自令而守兩以殘賊免而賞之沾沾自  
喜者在此朝廷榮辱進退之權果不能奪  
人之性生。

### 王敬則

王敬則爲暨陽時有一部劫逃入山爲人患敬  
則遣人致意劫帥使出首當相申論郭下廟神  
甚酷烈敬則乃引神爲誓必不相負劫帥旣出  
敬則於廟設酒會坐收縛曰吾啓神若負誓還

神十牛。今不可違誓。卽殺十牛解神。并斬諸劫。後遷吳興太守。郡舊多剽掠。敬則錄得一偷。召其親屬於前。鞭令偷身長掃街路。久之。乃令舉舊偷自代。諸偷恐爲所識。皆逃走。境內以清。

殺降近虐。而除盜有不嫌於過嚴。至今舉舊偷以自代。此緝盜第一法。

### 韓褒

韓褒爲北雍州刺史。州多盜賊。褒密訪之。並豪右所爲。而陽不知之。厚加禮遇。謂曰。刺史起自

書生安知督盜所賴卿等共分其憂耳乃悉召  
傑黠少年素爲鄉里患者置爲主帥分其地界  
有盜發而不獲者以故縱論被署者莫不惶懼  
首伏曰前盜發者並某等爲之所有徒侶皆列  
其姓名或亡命隱匿者亦悉言其所在褒乃取  
惟得盜名乃可爲此榜不然爲論兒所笑  
盜名簿藏之因大牘州門曰行盜者可急來首  
卽除其罪盡今日不首者顯戮其身籍沒妻子  
以賞前首者旬日之間諸盜咸悉首盡褒並原  
其罪許以自新繇是群盜屏息

此亦以盜詰盜、然而教化行於其間矣。

司馬悅

司馬悅爲豫州刺史、上蔡董毛奴齎錢五千、死於道路、或疑張堤爲劫、又於堤家得錢五千、堤懼掠自誣、悅疑其不實、引毛奴兄靈之謂曰、當時狼狽、應有所遺、得何物、答曰、得一刀鞘、悅取視之、曰、此非里巷所爲也、乃召州內刀匠視之、有郭門者曰、此門所作、賣與隣人董及祖、悅收及祖詰之、歛服、靈之又於及祖身上認得毛奴



所衣皂襦遂釋堤

既能得盜亦已平寃

彭城王高浹

高浹爲滄洲刺史有一人從幽州來驢馱鹿脯  
至滄州界脚痛行遲會一人爲伴遂盜驢及脯  
去○明旦告州浹乃令左右及府僚吏分市鹿脯  
不限其價其主見脯識之推獲盜者轉定州刺  
史○有人被盜黑牛背上有毛浹乃詐爲上符市  
皮○倍酬價值使牛主認之因獲其盜定州有

老母姓王孤獨種菜三畝數被偷盜乃令人客  
往書菜葉爲字明日市中看葉有字獲賊爾後  
境內無盜

此公詰盜多用小術然終不失爲能吏

### 符融

符融爲冀州牧有老姥於路遭劫喊賊路人爲  
逐擒之賊反誣路人時已昏黑莫知其孰是乃  
俱送之融見而笑曰此易知耳呵二人並走先  
出鳳陽門者非賊旣而還入融正色謂後出者

曰汝真賊也何誣人乎賊遂服罪蓋以賊若善走必不被擒故知不善走者賊也

偶爾徵盜則然然善走而被擒者何可以一律論

### 蘇無名

天后時嘗賜太平公主細器寶物兩食盒所值黃金百鎰公主納之藏中歲餘盡爲盜所得公主言之天后大怒召洛州長史謂曰三日不得盜罪死長史懼謂兩縣主盜官曰兩日不得賊

死尉謂吏卒曰吏卒游徼一日必擒之擒不得  
先死吏卒游徼懼計無所出衢中遇湖州別駕  
蘇無名相與請之至縣游徼白尉曰得盜物者  
來矣尉怒曰何誣辱別駕無名笑曰吾歷官所  
在擒姦摘伏有名盜至前無得脫者此輩應先  
聞之故請爲解厄耳尉白長史長史大悅降階  
執其手曰今日遇公却賜吾命無名曰請與君  
求見對玉階乃言之於是天后召謂曰卿得賊  
乎無名曰若委臣取賊無拘日月且寬府縣令

牧津

言

天卷四十二

八

不追求、仍以兩縣擒盜吏卒、盡以付臣、爲陛下取之、亦不出數日耳、天后許之、無名戒吏卒、緩至月餘、值寒食、無名盡召吏卒、約曰、十人五人爲侶、於東門北門伺之、見有胡人與黨十餘、皆衣縷經、相隨出、赴北邙者、可踵之、而報、吏卒伺之、果得、馳白、無名往視之、問伺者諸胡何若、伺者曰、胡至一新塚、設奠而哭、不哀、旣徹奠、卽巡行塚旁、相視而笑、無名喜曰、得之矣、因使吏卒盡執諸胡、而發其塚、剖棺視之、棺中盡寶物也、

奏之。天后問無名、卿何才智過人而得此盜。對曰：臣非有他計，但識盜耳。當臣到都之日，卽此胡出葬之時，臣見卽知是偷，但不知其葬物處。今寒食節拜掃，計必出城尋其所之，足知其墓。賊卽設奠而哭不哀，明所葬非也。奠而哭畢，巡塚相視而笑，喜墓無損傷也。向若陛下迫促府縣擒賊，計急必取之而逃。今者更不追求，自然意緩，故未將出。天后悅，賜金帛，加秩二等。

大抵擒盜緩急異用，此故以緩得之，無名

實能辨盜於蚤，卽其請對數言，曾中已自  
了了，此君才智，直是過人。

刁雙

刁雙除西兗州刺史，時盜賊蜂起，州人張桃弓  
等招聚亡命，公行劫掠，雙至境，先遣使諭桃弓，  
示禍福。桃弓卽隨便歸罪，雙舍而不問。後有  
盜發之處，令桃弓追捕，咸悉擒獲。於是州境清  
肅。

服盜之心，得盜之用。

楊津

楊津爲岐州刺史，有武功人齋，三匹去城十里，爲賊所劫。時有使者馳驛而至，被劫人因以告之。使者到州，以狀白津。津乃下教云：「有人着某色衣，乘某色馬，在城東十里被殺，不知姓名。若有家人，可速收視，有一老母，行哭而出，云是己子。於是遣騎追收，並緝俱獲。自是合境畏服。至於守令僚佐，有濁貨者，未曾公言其罪，常以私書切責之。官屬感厲，莫有犯法者。」



只是應用得捷。○如此明察人而御屬吏  
乃不以刻而以厚。

張鷟

張鷟在河陽有客失驢因捕急盜乃夜放驢而  
藏其鞍鷟令客勿秣驢夜縱之驢尋向所餵處  
遂捕其家得鞍人服其智。

爲術巧而爲法便。

張壽

張壽爲長安令時昆明池側有劫殺奉勅十日

內須獲賊壽至行劫處尋蹤續見一老婆於樹下賣食以從騎馱來入縣供以酒食經三日還送舊坐處令一腹心人看有人共婆語卽捉來須臾一人來問明府若推逐卽被布衫龍頭送縣一問具承并賊並獲

此法亦無甚奇但賊智不出其所料耳

### 柳慶

柳慶領雍州別駕有賈人持金二十斤寄居京師每出常自執鑰無何緘閉不異而並失之郡

縣謂主人所竊、自誣服。慶疑之、乃召問賈人曰：卿鑰恒置何處？對曰：自帶。慶曰：頗與人同宿乎？曰：無。與同飲乎？曰：日者曾與一沙門、再度酣宴、醉而晝寢。慶曰：沙門乃真盜耳。卽遣捕沙門、乃懷金逃匿。後捕得、盡獲所失金。又有胡家被劫、郡縣按察、莫知賊所。隣近被囚者甚多。慶乃作匿名書、多徬官門曰：我等共劫胡家、徒侶混雜、終恐泄露。今欲首伏、懼不晚罪。便欲來告。慶乃復施免罪之牒。居一日、廣陵王欣家奴面縛自

告牒下、因此盡獲餘黨、

察鑷金之沙門易、作匿名書鉤奴自告、  
於此乃見巧心、

王璩

王璩爲襄州中盧令、有賊久訊不得、情偶於賊、  
囊中得故紙、揭示之、乃房陵商人道引、爲賊所  
掠者、賊卽引伏、

有據卽不能自隱、

韓琦

韓魏公琦知鄆州京東素多盜捕盜之法以百  
日爲三限限滿不獲者抵罪盜未必得而被刑  
者衆琦請獲他盜者聽比折除過捕者有免之  
路故盜多獲朝廷著以爲法

通此一路亦可鼓舞人○此法今亦可通  
行

晁補之

晁補之知齊州力於爲政有羣盜晝掠塗巷補  
之默得其名一日宴客召賊曹授以方略酒行

未竟悉擒以來一府爲撤警

妙在聲色不動

### 曾鞏

曾鞏知齊州其治以疾姦急盜爲本屬民爲保伍使譏察其出入有盜則鳴鼓相援每發輒得盜有葛友者名在捕中一日自首鞏飲食冠裳之假以騎從鞏所購金帛隨之夸徇四境盜聞多出自首鞏外示章顯實欲携貳其徒使之不能復合自是外戶不閉

若盜賊者人人飲食冠裳之日亦不給惟  
偶得渠魁以鼓弄群偷乃爲得之

范純粹

范純粹尹洛賈者有金數十兩爲同行所盜訟  
至官事迹甚明而盜者抵諱莫伏粹令吏搜檢  
盜者身無所獲得一鎖匙而已卽時押下吏莫  
能曉粹潛令人往盜者家詐以其意齎匙開篋  
取銀盜家誠其事付納粹引二賈至問訟者曰  
爾銀若干包以何物有別記驗否賈歷言無不

中者卽面付銀還盜者抵罪衆始服其神

亦幸得此一匙耳不然賈物何從得出

### 高防

左丞高防守蔡州日部民王又爲賊所劫捕得其黨伍人繫獄窮理贓仗以具錄事叅軍司徒達判官盧紘據案請加極刑防疑其不實取贓閱之因召王又問曰爾家所失衫袴是一端布耶又曰然防令校其幅尺皆廣狹不同又疎密差異賊乃稱寃防曰何故伏罪賊曰不任捶楚



蓋自誣以求速死耳。居數日獲其本賊。紘達叩頭請罪。防皆不奏。得活者欲詣闕訟防之功。誦紘達之罪。防遽令止。絕爲製衫帽。具酒食。諭而遣之。

辨盜證。自應爾爾。其不可及處。在不以已之得情。形人之失。

蒲宗孟

蒲宗孟知鄆州日。有盜黃麻胡者。劫良民。使自掘地倒埋之。觀其足動。以爲戲樂。恭敏獲其黨。

先剔去足筋然後置於法先是寇依梁山濼縣官有用長梯窺蒲葦間者宗孟下令禁毋得乘小舟出入濼中賊既絕食遂散去凡獲盜卽日輦金至中行賞以故人人用力斬捕略盡

信賞必罰爲政之經於捐軀追捕之事尤在激勸

尹伊

尹伊爲司法叅軍時金城坊人家有故所劫者久捕賊不獲時楊纂爲雍州長史判勘京城坊

市諸胡盡禁推問伊判之曰賊出萬端詐僞非  
一亦有胡着漢帽漢着胡帽亦須漢裏兼求不  
得胡中直覓請追禁西市胡餘請不問纂初不  
同其判遽命沉吟少選乃判曰纂輸一籌餘依  
判太宗聞之笑曰朕用尹伊楊纂聞義伏善輸  
一籌朕復得幾籌耶俄果獲賊

非伊之能察盜亦以纂不解事自合聽人  
揄揶

李常

李常知齊州素多盜常痛治之殊不止他日得黠盜察其可用刺爲兵使直事鈴下間問以盜發輒得而不衰止之故曰此繇富家爲之囊使盜自相推爲甲乙官吏巡捕及門擒一人以首則免矣常曰吾得之矣乃令凡得藏盜之家皆發屋破柱拔其根株盜賊遂清

真是窮盜之源

許宗裔

許宗裔興劔州有於燈下識認劫賊曉告吏捕

卷四十二  
之所收贓惟縲絲紬卷不禁拷掠遂誣服送州  
囚言其物是家有與失主互爭卽命取兩家縲  
絲車又問紬卷各用何物爲胎心一云杏核一  
云丸子卽開示之見杏核仍以絲繩安於車舩  
量其大小亦是自家物被劫者受妄認之過巡  
捕吏伏拷決之辜其枉獲雪

辨盜惟在辨贓

劉皓

劉皓初爲趙州林城令決事嚴明會鞠劫盜獄

吏令盜僞通買物者十餘人、以狀稟乞追證、意欲乘時規利、皓佯爲無能者、判曰、並要正身、違限重斷、及期、如數勾至、皆衣服鮮潔豪子也、皓命屏鞠獄吏、別以他吏引賊至庭下、認之、皆無識者、皓曰、爾能通姓名、而有不識者乎、賊愕然、實告、命盡釋之、當行吏置重法、一境欽畏、不敢欺、皓謂諸吏曰、我河北村秀才、深知民間利病、爾乃敢爾、宜屏縮以候來者、

凡訊盜、須卽在擒獲時審定、略轉盼、則誣

攀四出若供吐同盜而面目不認者又其常也

### 陳襄

陳襄調浦城主簿攝令事縣多世族以請託脅持爲常襄每聽訟必使數吏環立於前私謁者不得發民有失物者賊曹捕偷兒至數輩相撐柱襄語之曰某廟鐘能辨盜犯者捫之輒有聲餘則否乃遣吏先引以行自率同列詣鐘所祭禱陰塗以墨而以帷蔽之命羣盜往捫少焉呼

出獨一人手無所汗扣之乃爲盜者蓋畏鐘方聲故不敢觸遂服罪

持小術以辨盜可一不可再

### 胡長儒

胡長儒爲寧海主簿縣有銅巖惡少年狙伺其間恒出鈔道爲過客患長儒僞衣商人服令蒼頭負貨以從陰戒騶卒十人躡其後巖中人突出邀之長儒方遜辭以謝騶卒俄集皆成擒窮其黨置於法



以身詰盜更是捷法、

歐陽穎

歐陽穎知歙州富家有盜啓其藏捕久不獲穎  
曰勿捕獨召富家二子械付獄劾之卽伏吏民  
初疑不勝楚掠而自誣及取出所盜物乃信

賊或在內原非怪事然穎能察此必悉知  
一家之情境乃得

任伯雨

任伯雨知開封府雍丘縣縣枕汴流漕運上下

盜竊擾人無虛夕、未有獲者、伯雨知其故、廼下令、綱運不得宿境內、不從者、斷其纜、趨京師者、督護以出境、自是外戶不閉、

運卒爲惡、今昔皆然、但不得宿境內、則勢必令晝夜不停而後可、若止令之出境、則隣邑亦受其害、故必須有一處法、乃佳、

### 孫德淵

孫德淵以進士調涑水丞、察廉遷沙河令、有盜秋桑者、主逐捕之、盜以叉自刺其足面、曰秋桑

例不禁採汝何得刺我主懼賂而求免盜不從  
訴之縣德淵曰若逐捕而傷瘡必在後今在前  
自刺也盜遂引服

刺盜而盜反訴主安有此法

### 楊告

楊告爲豐城主簿邑有賊人投尸於江人畏不  
敢言告親往擒之有言賊黨欲報怨者告不爲  
動旣而果乘夜欲刺告告又捕得之境內肅然  
除暴須有此定力

楊繪

楊繪知興元府吏請攝穿窬盜庫縑者繪就視之踪跡不類人所出入乃呼戲沐猴者詰於庭一證具服人服其明在郡獄無繫囚

妙在踪跡出入

金武都

金武都遷商水令縣素多盜廉得姓名榜通衢約毋再犯悉奔他境

難在廉得姓名此法今亦可用

陳文偉

陳文偉爲山東安丘令，流賊百餘人掠庫，偉勅羣吏第謹簿書，諸寶藏吾無慮也。羣賊大掠庫金去，良久問左右曰：「賊去幾何？」曰：「三十里矣。」勅左右以一騎一彈來，馳赴之，問諸賊孰爲首者，彈發左目中，之又再彈右目中，賊大駭，伏地請死。偉曰：「好爲吾送庫金還。」羣賊唯命。偉以一騎尾其後，抵縣，羣賊請歿。偉曰：「吾何有衆賊奴各杖三十遣之。」偉自負拓弛，意不以見功。御史

竟以縱寇論劾、免官罷歸、

其人亦慷慨可喜、然劫盜罪自應死、杖而遣之、無此紀法、御史之劾爲是、

### 錢藻

錢藻知廣信、有商人被殺、浮於河、其子求屍得之、疑瀕河人殺之也、訟於鉛山縣、逮係數十人、備極拷掠、卒無狀、縣以白府、錢心知其冤、乃爲畫釋一行人、商子泣曰、賊可縱耶、錢曰、此輩非賊也、方爲汝捕真賊耳、密問汝父何商、曰布、何

地曰某地錢密逮其地布行諸牙僧及諸任僦  
舟者詢其詳商以某日買布若干僦某甲舟某  
日發矣錢知賊繇舟人逮之榜訊數百不肯承  
錢密遣官往搜其家亦無得詢諸比隣鄰人云  
前某夜多吠屨往來剝喙但不知其故耳卽有  
布當不以人家乃遍搜之山谷林野間時方刈  
獲野多聚稈獨一處最高大發之皆布也舟人  
乃服罪

凡詰盜最不可拘成案亦最不可着成心

惟虛衷密察得之者十九

黃瓌

黃瓌守化州賊胡公威擾害地方瓌乃募民驍勇者伺其所經之處而陰撲之繇是賊黨畏懼聽招民獲安息

陰伺而撲於所經之處以此禦小盜則可

王端毅公

王端毅公恕初知揚州折獄咸得其情有一老婦常誣隣人爲盜恕問其賊有二裙一寬而長



一短而窄、老婦謂其子婦之裙、其隣謂其嫂與妻之裙、公詰老婦曰、爾一人之裙、詎宜有長短廣狹不同耶、遂明其非盜。

辨盜只有審賊一法。

### 萬觀

萬觀知嚴州、七里礮漁舟數百艘、晝漁夜竊、行旅患之、觀令十艘爲一甲、各限以地、使自守、繇是無復有警。

今江湖舟楫叢雜之處、宜用編甲之法。

# 戴金

戴金解褐授蘇州府推官會庫亡折糧銀若干兩長吏日考掠守庫者竟無驗金乃遍召諸糧役於庭陰以一牌用濃硃塗之藏寘後堂暗室中詰之曰而輩以糧役役於官乃茲糧金亡欲避咎弗獲也余有牌在後堂甚神能辨盜盜手摩之蹉然有鳴聲衆如指諸摩出視其手皆硃中一人獨不硃立詰之遂首服還所盜金而守庫者具得釋其訊獄神明奇中若此

庫金之亡大較已有端倪借牌以神其說  
不然手之硃不硃亦未便可以斷人

王愷

王愷爲平原令有麥商夜經村寺被劫陳譖於  
縣愷故匿其事陰令販荳者和少熟荳其中夜  
過寺門復劫去令捕兵易服就寺僧貨荳中有  
熟者遂收捕不待訊而服自是群盜屏跡  
似於用術然詰盜政不妨術也

李渭

李渭知韶州府先是韶有二源之役桂苻之警  
未殄渭集諸寮屬諭之曰夫子告康子不欲二  
字千古弭盜張本儻多欲則身爲谿壑竭民膏  
脂不足以填之百姓安得不盜弭山中盜易弭  
心中盜難敢忘自責聞者悚息

真是千古弭盜根本

牧津卷之四十二 終

牧津卷之四十三目

儒治上

宓子賤

子路

子游

子貢

倪寬

范甯

劉梁

韓愈

陽城

周惇頤

謝良佐

張載

陳襄

李之才

游 醉

馬 伸

張 枳

牧津卷之四十三 儒治上

明山陰祁承燦輯

宓子賤

宓子賤爲單父辭於夫子夫子曰毋迎而距也

毋望而許也許之則失守距之則閉塞譬如高

山深淵仰之不可極度之不可測也子賤曰善

敢不承命瀕行過於陽晝曰子亦有以送僕乎

陽晝曰吾少也賤不知治民之術有釣道二焉

請以送子子賤曰釣道柰何陽晝曰夫扱綸錯



餌迎而吸之者、陽橋也、其爲魚薄而不美、若存  
若亡、若食若不食者、魴也、其爲魚也博而厚味、  
子賤曰、善、於是未至單父、冠蓋迎之者、交接於  
道、子賤曰、車驅之、車驅之、陽晝之、所謂陽橋者  
至矣、於是至單父、請其耆老賢者、而與之共治、  
初子賤受單父之命、恐魯君聽讒言、使已不得  
行其政、於是辭行、故請君之近史二人與之俱、  
至官、宓子戒其邑吏、令二史書、方書、輒掣其肘、  
書不善、則從而怒之、二史患之、辭請歸魯、宓子

曰子之書甚不善子免而歸矣二史歸報於君  
曰宓子使臣書而掣肘書惡而又怒臣邑吏皆  
笑之此臣之所以去而來也魯君以問孔子曰  
宓子齊君子也其才任霸王之佐屈節治單父  
將以自試也意者以此爲諫乎公寤太息而歎  
曰此寡人之不肖寡人亂宓子之政而責其善  
者數矣微二史寡人無以知其過微夫子寡人  
無以自寤遂發所愛之使告宓子曰自今已往  
單父非吾有也從子之制有便於民者子決爲

之五年。一言其要。宓子曰。敬奉詔。遂得行其政。於是單父治焉。躬敦厚。明親親。尚篤敬。施至仁。加懇誠。致忠信。百姓化之。齊人攻魯。道由單父。單父之老請曰。麥已熟矣。今齊寇至。不及人人自收其麥。請放民出。皆獲。傳郭之麥。可以益糧。且不資於寇。三請而宓子不聽。俄而齊寇逮於麥。季孫聞之。怒。使人讓宓子曰。民寒耕熟耘。曾不得食。豈不哀哉。不知猶可以告者三。而子不聽。非所以爲民也。宓子乃蹙然曰。今茲無麥。明

年可樹。若使不耕者獲，是使民樂有寇，且得單  
父一歲之麥，于魯不加彊，喪之不加竭。若使民  
有自取之心，其創必數世不息。季孫聞之，赧然  
而愧曰：「地若可入，吾豈忍見宓子哉？」孔子謂子  
賤曰：「子治單父而衆說，子何施而得之也？」對曰：「  
不齊父其父，子其子，恤諸孤而哀喪紀。」孔子曰：「  
善，小節也。小民附矣，猶未也。」曰：「不齊所父事者  
三人，所兄事者五人，所友者十有二人。」孔子曰：「  
父事三人，可以教孝矣；兄事五人，可以教弟矣；

友十二人、可以教學矣、是士附矣、猶未也、曰、此地有賢於不齊者五人、不齊師之、而稟度焉、皆敎不齊、所以治人之道、孔子曰、昔堯舜聽天下、務求賢以自輔、夫賢者、百福之宗也、神明之主也、惜乎不齊之所以治者小也、所治大則庶幾乎賤在單父、身不下堂、鳴琴而治、人謂子賤則君子矣、伏四肢、全耳目、平心氣、而百官理、任其數而已、三年、孔子使巫馬斯觀政焉、巫馬期陰免衣、衣敝裘、入單父界、見漁者得魚、輒舍之、巫

馬期問曰、凡漁者爲得、何以得魚卽舍之、漁者  
曰、魚之大者名爲鱣、吾大夫愛之、其小者名爲  
鯁、吾大夫欲長之、是以得二者輒舍之、巫馬期  
返以告孔子曰、宓子之德至、使民聞行、若嚴形  
於旁、敢問宓子何行而得於是、孔子曰、吾嘗與  
之言曰、誠於此者形乎彼、宓子行此術於單父  
也。

受命於師、請命於友、而尤必假便宜於君  
聽五年而報政、不齊之爲單父、何兢兢也、

○古稱師臣者帝又曰知人維艱知子賤  
父事兄事及稟度而師者不易言則知鳴  
琴而理者不易言矣

子路

子路爲季氏宰季氏祭逮昏而奠終日不足繼  
以燭有司踣以臨祭其爲不敬也大矣他日祭  
子路與焉室事交乎戶堂事交乎階質明而始  
行事晏朝而徹孔子聞之曰孰謂由也而不知  
禮魯有溺者子路拯之其人拜之以牛子路不

受孔子曰、魯人必不拯溺矣、子路曰、由也聞謠  
夫子曰、仁者天地之心也、天地以生物爲心、非  
圖報也、孔子曰、由是也、前言戲之也、後爲蒲宰  
辭孔子、孔子曰、蒲多壯士、又難治、然吾語汝、恭  
以敬、可以執勇、寡以正、可以比衆、恭正以靜、可  
以報上、及治蒲三年、孔子過之、入其境曰、善哉  
由也、恭敬以信矣、入其邑曰、善哉由也、忠信而  
寬矣、至庭曰、善哉由也、明察以斷矣、子貢執轡  
而問曰、夫子未見由之政、而三稱其善、其善可



得聞乎。孔子曰：吾見其政矣。入其境，田疇盡易，  
草萊甚闢，溝洫深治，此其恭敬以信，故其民盡  
力也。入其邑，墻屋完固，樹木甚茂，此其忠信以  
寬。故其民不偷也。至其庭，庭甚清閑，諸下用命，  
此其明察以斷。故其政不擾也。以此觀之，雖三  
稱其善，客盡其美乎。

課政者觀其淺，采風者得其深，豈問簿書  
哉。夫子謂由千乘之國，可使治賦而治蒲。  
三善絕不在才局間論作用，則撫字之實。

意端可知矣

子游

子游宰武城以禮樂爲教明人倫之序定上下  
之分風聲物采話語動履一一不妄故民無逸  
志邪心絃歌之聲不絕邑有澹臺滅明者貴之  
不喜賤之不怒廉於行已子游與之

上作而下效言公之化真是身先

子貢

子貢爲信陽宰將行辭於孔子孔子曰勤之慎

之○奉○天○子○之○時○無○奪○無○伐○無○暴○無○盜○子○貢○曰○賜○  
也○少○而○事○君○子○豈○以○盜○爲○累○哉○孔○子○曰○汝○未○之○  
詳○也○夫○以○賢○伐○賢○是○謂○之○奪○以○不○肖○伐○賢○是○謂○  
之○伐○緩○今○急○誅○是○謂○之○暴○取○善○自○與○是○謂○之○盜○  
盜○非○竊○財○之○謂○也○吾○聞○之○知○爲○吏○者○奉○法○以○利○  
民○不○知○爲○吏○者○枉○法○以○侵○民○此○怨○之○所○由○也○治○  
官○莫○若○平○臨○財○莫○如○廉○廉○平○之○守○不○可○改○也○匿○  
人○之○善○斯○爲○蔽○賢○揚○人○之○惡○斯○爲○小○人○內○不○相○  
訓○而○外○相○謗○非○親○睦○也○言○人○之○善○若○已○有○之○言○

人之惡若已受之故君子無所不慎焉子貢以是道行之信陽信陽大治

蒞官莫若平臨財莫若廉然世謂廉者多苛刻不知廉者不忍取民之有而安忍刻待乎民若藉不敢取民之有以立名卽其廉已非矣安能無刻故至仁者必廉而名廉者未必仁

倪寬

倪寬治尚書事歐陽生以郡國選詣博士受業

貧無資用、常爲弟子都養、時行賃作、帶經而鋤、  
休息輒讀誦、以射策補廷尉文學卒史、寬爲人  
溫良廉知自將、善屬文、然懦於武、口弗能發明  
也、時張湯爲廷尉、廷尉府盡用文史法律之吏、  
而寬以儒生在其間、見謂不習事、除爲從史之  
北地視畜數年、還至府、上畜簿、會廷尉、時有疑  
奏、已再見郤矣、掾史莫知所爲、寬爲言其意、掾  
史因使寬爲奏、奏成讀之、皆服、以白廷尉湯、湯  
大驚、上寬所作奏、卽時得可、異日湯見上、問曰、

前奏非俗吏所及誰爲之者湯言倪寬上曰吾固聞之久矣以寬爲奏讞椽舉侍御史見上語經學上說之從問尚書一篇擢爲中大夫遷左內史治民勸農理訟擇用仁厚士推情與下不求名聲吏民大信愛之寬表奏開六輔渠定水令以廣溉田時裁濶狹與民相假貸以減租多不入後軍發左內史以負租課殿當免民間皆恐失之大家牛車小家擔負輸租襁屬不絕課更以最上由此愈奇寬初梁相褚大通五經爲

博士、時寬爲弟子、及御史大夫缺、徵褚大白以爲得御史大夫、至洛陽、聞倪寬爲之、褚大笑、及至、與寬議封禪於上前、大不能及、退而服曰、上誠知人、

擇用仁厚、不求名聲、洵非俗吏、不審何以驚張湯、而動武帝、

范甯

范甯少篤學、多所通覽、時方競尚浮虛、儒雅日替、甯以爲其源始於王弼、何晏、二人之罪、深於

桀紂乃著論崇儒抑俗以救之始解褐爲餘杭  
令在縣興學校養生徒潔已修禮志行之士莫  
不宗之期年之後風化大行自中興以來崇學  
敦教未有如寧者也。在職六年遷臨淮太守徵  
拜中書侍郎多獻替被讒疎隔求補豫章帝曰  
豫章不宜太守何急以身試死耶寧不信卜占  
固請行臨發上疏言道尚虛簡政貴平靜坦公  
亮於幽顯流子愛於百姓然後可以輕夷嶮而  
不憂乘休否而常夷先王所以致太平如此而



已又言中原喪亂、流寓江左、庶有旋反之期、故  
許其挾注本郡、自爾漸久、人安其業、丘壟墳柩、  
皆以成行、雖非本邦之名、而有安土之實、今宜  
正其封疆、以土斷人戶、明考課之科、修閭伍之  
法、初、寧之出、非帝本意、故所啓多合旨、寧在郡  
設庠序、遣人往交州採石磬以供學用、改革舊  
制、不拘常憲、遠近至者千餘人、資給衆費、一出  
私廩、并取郡四姓子弟、皆充學生、課讀五經、又  
起學臺、功用稱廣、江州刺史王凝之上言、詔曰

漢宣云、可與共治天下者、良二千石也、若范滂  
果如凝之所表者、豈可復宰郡乎、以此抵罪、

范武子始終以興學校、養生徒、文學飾吏  
治爲已任者、其所論政貴平靜、切切平時  
政之非、真不愧儒者作用、○置學臺課弟  
子、正良二千石事、而竟以此抵罪何耶、豈  
其著論崇儒抑俗之時、所見忤於世者深  
乎、

劉滂

劉梁少孤貧、桓帝時、除北新城長、告縣人曰、昔  
文翁在蜀、道著巴漢、庚桑鎖隸、風移畏壘、吾雖  
小宰、猶有社稷、苟赴期會、理文墨、豈本志哉、乃  
更大作講舍、延聚生徒數百人、朝夕自往勸誡  
身執經卷、試策殿最、儒化大行、

聚徒勸誡、執經試策、此政非難、而實能興  
起儒化爲難、若課業雖勤、而士習日敝、吾  
何以觀之哉、

韓愈

韓愈、德宗時爲山陽令、有愛在民、生子多以其  
姓字之、累遷刑部侍郎、以諫迎佛骨、貶潮州刺  
史、初至、問民疾苦、皆曰、惡溪有鱷魚、食民畜產  
且盡、民以是窮、數日、愈自往視、爲文、令其屬秦  
濟以一羊一豚投溪水而祝之、祝之夕、暴風震  
電起谿中、數日水盡涸、鱷魚西徙六十里、自是  
潮無鱷患、始潮人未知學、愈命進士趙德爲之  
師、文風遂振、復徙袁州刺史、袁人以男女爲隸  
過期不贖、則沒入之、愈至、悉計庸得贖所沒、歸

之○父○母○七○百○餘○人○因○與○約○禁○其○爲○隸○及○長○慶○中○  
遷○愈○爲○京○兆○尹○六○軍○不○敢○犯○法○私○相○謂○曰○是○尚○  
欲○燒○佛○骨○何○可○犯○也○

退之○作○原○道○君○子○猶○以○爲○未○徹○其○本○原○然○  
馴○鯉○魚○之○暴○則○至○誠○之○動○物○矣○振○文○教○革○  
沒○隸○至○使○六○軍○不○敢○犯○法○儒○貴○實○用○文○公○  
之○爲○文○也○夫○何○疑○

陽城

陽○城○出○爲○道○州○刺○史○治○民○如○治○家○宜○罰○罰○之○宜○

賞賞之、不以簿書介意、月俸取足則已、官收其  
餘、日炊米二斛、魚一大鶩、置甌杓道上、人共食  
之、州產侏儒、歲貢諸朝、城哀其生離、無所進帝  
使求之、城奏曰、州民盡短、若以貢、不知何者可  
供、自是罷、州人感之、以陽名子、前刺史坐罪下  
獄、吏有幸於刺史者、拾不法事告城、欲自脫、城  
輒榜殺之、賦稅不時、觀察使數誚責州、當上考  
功、第城自署曰、撫字心勞、催科政拙、考下下、觀  
察府造判官督賦至州、怪城不迎、以問吏、吏曰、

刺史以爲有罪、自囚於獄、判官驚馳入謁城曰、  
使君何罪、我奉命來候安否耳、留數月、城不敢  
歸、寢館外以待命、判官遽辭去、府復遣官來案  
舉、義不欲行、乃載妻子中道遁去、

陽城爲諫官、至八年不言、人已莫窺其際、  
而出爲刺史、不以左遷係念、一至輒有實  
惠於地方、此君胸次、更令人美、能窺其際、  
○催科亦撫字中一事、若一味寬恤、究竟  
國課終不可缺、必至勢迫而立法嚴、則積

猾之里胥得利而良民反受其害故實能  
爲國家作催科中之撫字乃真愛民之吏  
陽道州治民如治家此意可師府復遣官  
其人乃至載妻子中道遁此其賢不減于  
城惜史不著其姓名

周元公惇頤

周茂叔惇頤慶曆間授洪州分寧縣主簿縣有  
獄久不決惇頤至一訊立辨邑人驚曰老吏不  
如也調南安司理參軍有囚法不當死轉運使



王達欲深治之、達苛刻、吏無敢與相可否、惇願獨力爭之、不聽、則置手板、歸取告身委之而去。曰、如此尚可仕乎、殺人以媚人、吾不爲也。達悟、囚得不死、遷知洪州南昌縣、南昌人迎喜曰、是能辨分寧獄者、吾屬得所訴矣、於是更相告語、莫違教命、蓋不獨以抵罪爲擾、實以行汙善政爲恥、其爲治精密嚴恕、務盡道理、民至今思之。歷合州判官、事不經手、吏不敢決、民亦不肯從、轉通判虔州、前在合陽、或諧之趙抃、抃臨之甚。

威惇頤處之起然清獻疑終不釋至是朴來爲  
守熟試惇頤所爲執其手嘆曰幾失君矣今日  
乃知周茂叔也薦之於朝擢提點廣南東路刑  
獄惇頤不憚出入之勞瘁毒之侵雖荒涯絕島  
人跡所不至者亦必緩視徐按務以洗冤澤物  
爲已任得罪者自以爲不寃時虞部郎中杜謔  
知瑞州禁百姓采石獨知州占斷人號爲杜萬  
石惇頤惡其奪民之利因爲起請凡任於州者  
買硯毋得過二枚遂著爲令云後分司南京力

不能返故鄉、愛廬阜之勝、築室其上、名曰濂溪、因定居焉、

元公、真儒也、而意在洗冤澤物、儒者之作、用、舍萬物一體之外、無真政事矣、惟是以清獻公之賢、而不免有威臨茂叔之事、上下之交、可易言哉、

### 謝良佐

謝良佐宰應城、胡安國以典學使者行部過之、不問職事、請以弟子禮見、入門見吏卒植立庭

中如土木偶人肅然起敬遂稟學焉佐嘗言爲政要得厲威嚴使事齊整甚易但失於不寬便不是人作處然寬亦須有制始得若百事不管惟務寬大則胥吏侮文弄法不成官府須要權常在手操縱予奪總不由人儘寬不妨建中靖國初官京師召對忤旨去監西京竹木場坐口語繫詔獄廢爲民上蔡天資篤實事有未徹則顙有泚其憤悱如此記問該贍程顥談及前史所引不爽一字顥以玩物喪志警之初未之信

後乃省悟程頤與之別一年問其所進曰但去  
得一矜字曰何故曰子細點檢得盡方有向進  
頤爲點頭後除書局官不謁執政或勸之對曰  
他安能陶鑄我自有命在

上蔡謂去一矜字難乃爲政而寬嚴在手  
圭角盡融無往非泰而不驕矣

### 張載

張橫渠先生載嘉祐初爲丹州雲巖縣令其政  
以敦本善俗爲先每月吉具酒食召鄉人高年

會於縣庭、親爲勸酬、使人知養老事長之義、問民疾苦、及告所以訓戒子弟之意、常患文檄之出、不能盡達於民、每召鄉長於庭、諄諄口諭、使往告其閭里、間有民因事至庭、或行過於道、必問某時命某告某事、問否、聞卽已、否則罪其受命者、故一言之出、雖愚夫孺子、無不預聞、呂晦叔薦載於朝、召見、上問治道、皆以漸復三代爲對、嘗謂仁政必自經界始、欲買田一方、畫爲數井、正經界、分宅里、立斂法、廣儲蓄、興學校、成

禮俗救菑恤患、厚本抑末、推先王之遺法、明當今之可行、有志未就、歲歉、家人惡米不鑿、將春之、先生亟止之曰、餓殍滿野、雖蔬食且自愧、又安忍有擇乎、甚或咨嗟對案、不食者數四、

子厚作令、惟敦本善俗是先、而使鄉長宣諭上意、又遇民輒問所諭之事、最可爲司牧者法、○謂仁政必自經界始、而顯然有欲井田一方之意、自然與時勢相左、所以較明道先生之作用、覺淺一籌、

陳襄

陳襄倡道海濱人稱爲述古先生者也仁宗朝  
王建之蒲城簿會邑令闕獨當縣事邑多世族  
前後令罕能制蔽蒙請託習以爲常襄夜寐夙  
興務究其弊訟之難聽積久者窮極本源剖決  
無留每聽訟必數人環列於前私謁者無所發  
由是邑人知不可干老奸宿猾縮首喪氣遷仙  
居令地僻隱民不知教襄於正歲因耆老來賀  
作勸學篇使門人讀於庭且諭之曰吾秩滿卽



去爾有子弟、亟遣就學、耆老翕然從之、每過社稷孔子廟、必下而趨、邑人自是有所矜式、有興建必爲民利、皆樂助焉、徙知河陽縣、始教民種稻、富弼爲郡、一見卽禮遇之、襄留意教化、進子弟于學、或讒之於弼、謂其誘邑子以資過客、弼疑焉、人勸毀學舍以塞謗、不聽、久之、弼以語襄、襄曰、自反而縮、雖千萬人吾往矣、公苟有感志、何名知己、益講說不少懈、弼由是愈奇之、還知常州、郡庠下窄、不足以容師生、襄爲拓之、其規

模遂爲諸郡庠序之冠、襄晨入其中、坐授諸生  
經義、旁決郡事、由是毘陵學者盛於二州、常州  
運渠橫過震澤、積水不得入江、爲蘇常數邑民  
田害、襄以渠之丈尺對民田之步畝、分授以浚  
深、廣有制、不月而成、遂削望亭古堰、而震澤積  
水乃北流、民害立除、旱且有溉、歲多豐穰、治平  
初、召還、將行、委官閱公帑、得雜收無名錢數百  
萬、因召積年有官逋、未償情可矜、而力不足者、  
悉以輸之、蓋襄淡于宴樂、故有餘、足以周民困、

述古爲政、首崇教化、不以讒言沮、而且終見信於鄭公、蓋自信於心、而亦能使人信之者、近世之學、尤在能使人信爲實學、若聽斷措置之善、特其餘耳、○導水入江、是三吳第一惠澤、余嘗令茂苑、茂苑六倉、半屬水窟、每區相度地勢、築爲長堤、以禦驟水、蘇皆澤國、無處求土、若就水中以蘧簾芻藁爲牆、栽柳兩行、相去三六、去牆六丈、又爲一牆、亦如此、漉水中淤泥、實蘧簾中、

候乾、則以水車去、兩牆之間、舊水牆間六丈、皆土、留其半、以爲堤脚、掘其半爲渠、取土以爲堤、每三四里、則爲一橋、以通南北之水、永無淹沒之患、此三吳百世之利也、會以遷去不果行、此念至今耿耿、因聊附識於此、

### 李之才

李之才、少師河南穆修、修性寡合、雖之才亦頻在呵怒中、之才事之益謹、卒能受易、初爲主簿、

權共城令時康節居母服築室於蘇門山百源之上之才自造其廬問曰子何所學曰爲科舉進取之學之才曰科舉之外有義理之學義理之外有物理之學物理之外有性命之學子知乎曰未也願受教于是康節始傳其學師禮甚嚴雖在野店飯必襴坐必拜先示以陸淳春秋意欲以春秋表儀五經既可語五經大旨則受易終焉之才器大難乎識者久之謂孟州司法事范雍守孟亦莫之知也雍初自洛建節

守廷安郡僚多送出境之才獨別近郊或病之  
謝曰情文貴稱公實不我知而出疆遠送非情  
豈敢以不情事范公及雍請安陸之才公檄見  
之洛陽前日遠送之人無一來者雍始恨知之  
晚

之才器大觀其誨康節數言自見胸中所  
負至於不以出疆遠送所不相知之人此  
意更見識力

游酢

游酢應程明道先生扶溝之招因受業焉元豐  
六年第進士調蕭山尉以薦爲太學錄遷博士  
乞外以便養得知河陽縣范純仁判官河南待  
以國士有疑輒咨之純仁移守潁昌辟自隨爲  
學教授及入相復以爲太學博士純仁罷酢亦  
請外僉判齊州移泉州徽宗立擢監御史歷知  
漢陽軍和舒濠三州酢性穎悟有治劇才時修  
奉祠館編氓困於征調所至騷然酢更數郡處  
之裕如民不勞而事集程門高第酢爲首稱

定夫之學以篤信入似一執見之士乃更數郡而處之裕如學問固不可以才局論也。

馬仲

馬仲初受成都郫縣丞至任未幾會納冬米成都浩穰守以委仲仲辭以多弊不可爲守問其故仲曰弊之大者由諸司吏人封抄拒之速禍守曰君旣知其弊尚何辭仲至場中則諸邑人紛然矣豐飲食示玩好飾美女凡可以蠱誘者



計百出。前此至者，不能自謹，一墮計中，則束手受制，莫敢誰何。伸盡逐之，嚴察吏不容纖介。負米至者，畧無留滯。時提舉常平孫俟按部至成都境上，早行見負擔者，假寐道傍，以待怪問之。俱應曰：「今年好受納官，某等至，無邀阻，故爭先詰其主名。」曰：「馬縣丞也。」孫嘆息不已，抵郡呼吏書牒薦之。卽日改秩。伸嘗以此語人曰：「人之利鈍自有時，但行直道，無用求於人也。」尋遷奉符丞，攝令事。方歲歉，而朝廷行茶引，伸拒之曰：「民

方救死不贍豈可重困之太守怒曰朝命安可  
抗伸曰伸爲令誠不忍見民轉溝壑守曰先須  
効爾事乃可行民間伸被効爭赴愬諸司或徑  
達臺省事遂解伸勇於爲義而韞藉深厚每曰  
吾志在行道以富貴爲心則爲富貴所累以妻  
子爲念則爲妻子所奪道不可行也故在廣陵  
行篋僅一擔圖書半之

夫丞簿倖貳要津所蔑視也任此者輒碌  
碌如輶駒不自振乃有宋大儒則多爲之

矣。周程百世師，其筮仕亦滯外僚，卽簿倅  
時，見宰天下之規模焉。時中蓋一丞耳，而  
割蠹拯危，豁如也。當其時，獨無梗之者耶。  
嗚呼！士先志，志在行道，古之人固不差小  
官矣。

張栻

張敬夫栻，淳熙中，除知靜江府，所統州十有五，  
遼夏荒殘，故多盜賊，徼外蠻夷，俗尚警殺，間入  
塞侵掠，而州兵皆脆弱，情濟，邕管斗入羣蠻中，

最爲重地。戍兵不能千人。獨恃左右江洞丁十餘萬爲藩蔽。杙知其弊。至則簡閬州兵汰冗補闕籍。諸州黥卒伉健者爲效周。日習月按。申嚴保伍之法。諭溪洞酋豪。弭怨睦隣。毋相殺掠。於是羣蠻帖服。朝廷買馬橫山。歲久弊滋。邊氓告病。而馬不時至。杙究其利病六十餘條。奏革之。諸蠻感悅。爭以善馬至。改知江陵府。安撫本路。一日去貪吏千四人。時湖北尤多盜。府縣往往縱釋。以病良民。杙入境。首劾大吏之縱賊者。罷

之○捕○姦○民○之○舍○賊○者○斬○之○令○其○黨○得○相○捕○告○以○  
除○罪○羣○盜○皆○遁○去○郡○瀕○北○邊○分○屯○諸○將○與○帥○守○  
每○不○相○下○帥○守○所○將○獨○神○勁○親○兵○及○義○勇○兵○比○  
年○亦○廢○簡○閱○不○足○恃○栻○以○禮○遇○諸○將○得○其○驩○心○  
又○加○恤○士○伍○勉○以○忠○義○每○案○親○兵○必○令○與○大○軍○  
雜○試○以○相○激○厲○均○犒○賞○修○義○勇○法○使○從○縣○道○階○  
級○前○以○農○隙○習○武○事○候○不○時○案○驗○加○賞○罰○士○咸○  
感○奮○並○淮○奸○民○出○塞○爲○盜○者○法○皆○處○死○異○時○官○  
吏○多○蔽○匿○弗○治○栻○捕○得○數○人○有○北○方○亡○奴○亦○在○

盜中、忒曰朝廷未能正名討賊、無使疆場之事、其曲在我、命斬之以徇於境、而縛其亡奴歸之、北人嘆曰、南朝有人、信陽守劉大辨怙勢希賞、廣招流民、而奪其見戶熟田與之、忒効大辨詐、謾所招流民不滿百、而虛增其數十倍、請論其罪、不報、章累上、大辨易他郡、以不職求去、

敬夫之學、以高明簡徑稱、而遇事乃動中、事機如此、然較之周程諸先生、不無少露風裁耳、

牧津卷之四十四目

儒治下

朱晦菴先生

陸九淵

楊簡

黃榦

真德秀

魏了翁

李方予

劉清之

胡朝穎

方克勤

王陽明

牧津卷之四十四

儒治下

明山陰祁永燦輯

朱晦菴先生

朱仲晦先生熹紹興中主泉州同安簿蒞政勤敏纖悉必親郡縣長吏事倚以決職兼學士選邑秀民充子弟員訪名士以爲表率日與講究修已治人之道禁婦女之爲僧道者孝宗卽位除知南康軍歲旱講求荒政多所全活痛懲奸豪之侵擾細民者訪白鹿書院遺址奏復其舊



每休沐輒一至，諸生質疑問難，誨誘不倦。浙東大饑，宰相王淮奏改熹提舉浙東常平茶鹽公事，卽日單車就道。先是熹所居鄉，每歲春夏之交，豪戶閉糶牟利，細民發廩強奪，動相賊殺，幾至挺變。熹常帥鄉人置義倉以賑之，米價不登，人得安業。至是奏行之，始拜命，卽移書他郡募米，商蠲其征。及至，則客舟之米已輻輳。熹日與僚屬鉤訪民隱，至廢寢食。案行所部窮山長谷，靡所不到。每出，單車屏徒從，一身所需皆自賁。

以行秋毫。不及州縣。以故所歷雖廣。而人不乏。所屬官吏。憚其風采。倉皇驚懼。常若使者壓其境。至自有引去者。尤以戢盜捕蝗興水利爲急。大抵措置悉如南康。而用心尤苦。熹知台州時。唐仲友已遷江西提刑。未行。熹行部至台。訟仲友者紛然。熹按得其實。奏上。淮匿不以聞。熹論愈力。乃下紹興府鞠之。獄具。因奪其新命。授熹。熹以爲是蹊田而奪之牛。辭不拜。陳賈首論其僞學。詔以熹主管台州崇道觀。後知漳州。奏。

除屬縣無名之賦七百萬。減經總制錢四百萬。以習俗未知禮采古喪葬嫁娶之儀揭以示之。命父老解說以教子弟。會朝論欲行泉汀漳三州經界。熹乃訪事宜擇人物及丈量之法上之。而土居豪右侵漁貧弱者以爲不便沮之。宰相劉正泉人也。其里黨亦多以爲不可行。布衣吳禹圭上書訟其擾人。詔且需後。差知潭州曾洞猷擾屬郡。熹遣人諭以禍福皆降之。申敕令嚴武備。戢奸吏抑豪民。所至興學校明教化。四方

學者畢至、嘗答范伯崇有云、當官廉謹、是吾輩  
本分事、不待多說、然微處細處、亦當照管、不可  
忽略、因循怠惰、自治既不苟、更能事上以禮、接  
物以誠、臨民以寬、御史以法、而簿書期會之間、  
亦無所不用其敬焉、則庶其少過矣、

真懇爲民、勵精居職、以國事爲身圖者、吾  
於先生見之、○奉公畏義、恒人所知、但得  
失之念、終不能不往來胸臆、所以持已御  
民、時有過中失正之弊、觀晦翁答范伯崇

書宛然無衆寡無大小無敢慢之心法此  
晦翁之自述生平從政者佩之爲座右銘  
可矣

陸子靜九淵

陸子靜九淵淳熙中差知荆門軍有縣丞問何  
時赴任九淵曰朝廷命速之任單騎卽行丞因  
言及虜人有南牧意九淵遽云如此則荆門乃  
次邊之地某當挈家若單騎却是有所畏忌也  
吏以故例白內諸局務外諸縣必有揭示約束

接賓受詞分日九淵曰安用是延見僚屬如朋  
友每日同官稟事衆有所見皆得辯爭利害於  
前九淵唯默聽候是非既明乃從容贊嘆以養  
其狗公之意雖賤隸走卒亦諭以義理接受無  
早暮下情盡達無壅故郡內官吏貪廉民俗習  
尚忠良材賦與猾吏暴強九淵皆得之於無事  
之日往時郡有追逮皆特遣人九淵唯令訴者  
自執狀以追爲立限皆如期而至輕罪則曉令  
解釋其有涉人倫者多使領元詞自毀之以厚

其俗惟怯終不可誨化乃始斷治詳其文狀以防反覆久之兩造有不持狀唯對辯求決嘗夜與僚屬坐吏白老者訴甚急呼問之體戰言不可解俾吏狀之謂其子爲羣卒所殺九淵判翌日呈僚屬難之九淵曰子安知不至是凌晨追究其子蓋無恙也人益服其明有訴遭竊脫而不知其人九淵自出二人姓名使捕至訊之伏辜盡得其所竊物還訴者宥其罪使自新因語吏曰某所某人尤暴吏亦莫知翌日有訴遭奪

掠者卽其人也。乃知追治吏人大驚。郡人爲以  
神初保伍之制。州縣以非急務。多不檢覆。盜賊  
得匿藏。九淵首申嚴之。姦無所蔽。有劫僧廬者。  
鄰伍捕獲。不逸一人。群盜屏息。荆門素無城。九  
淵以郡在江漢之間。爲四集之地。審度決計。召  
集義勇。優給傭直。躬自勸督。役者樂趨。竭力工  
倍。二旬訖築。初計者擬費緡錢二十萬。至是僅  
費緡五千。而工畢。又郡學貢院客館官舍。衆役  
並興。初俗習惰。人以執役爲恥。吏惟好衣閒觀。



至是督役官吏布衣雜役夫佐力相勉以義不專事威荆門兩縣置壘歲困送迎藏庫空竭調度倚辦商稅先是日差使臣暨小吏伺商人於門檢貨給引然後至務務唯據引入稅出門又覆視官收無幾而門吏取賄多藏覆商苦重費大半繇僻途務入日縮九淵罷去之或曰門譏所以防奸一旦罷廢商冒利必有不至務者九淵曰是非爾所知即日揭示俾徑至務有一巨商已遵僻途忽聞新令復出正路巡尉卒於岐

捕之、九淵訊得其實、勞而釋之、巨酋感涕、三  
歲收增倍、湖北諸郡、士多逃徙、視官府如傳舍、  
不可禁止、緩急無可使者、九淵病之、乃信捕獲  
之賞、奔竄之刑、又數閱射、中者受賞、役之加傭  
直、不使饑寒、相與悉心、弓矢逸者絕少、九淵平  
時按射、不止於兵伍、郡民皆令得與、中亦同賞、  
薦舉其屬、不限流品、嘗曰、古者無流品之分、而  
賢不肖之辨嚴、後世有流品之分、而賢不肖之  
辨略、與趙子直書有曰、益國裕民之心、在吾人

固○非○所○乏○弊○之○難○去○者○多○在○簿○書○數○目○之○間○此○  
奸○貪○寢○食○出○沒○之○處○而○吾○人○之○所○疎○者○世○儒○耻○  
及○簿○書○獨○不○念○伯○禹○作○貢○成○賦○周○公○制○國○用○孔○  
子○會○計○當○洪○範○八○政○首○食○貨○孟○子○言○王○政○亦○先○  
制○民○產○正○經○界○皆○可○恥○乎○九○淵○家○居○時○鄉○人○苦○  
旱○羣○禱○莫○應○請○九○淵○除○壇○山○巔○大○雨○隨○至○荆○門○  
亦○旱○九○淵○每○有○祈○必○疎○雨○隨○車○郡○民○異○之○治○化○  
孚○洽○踰○年○筭○筭○不○施○至○於○無○訟○

化導與整齊並用若子靜之仕不虛真儒

至謂簿書數目之間，奸貪寢食出沒之處，  
吾輩尤當悉心，更不虛真儒矣。○趙廣漢  
以鉤距發奸，人驚如神。先生不逆詐，不億  
不信，而老者之訴盜者之脫，一一如照。先  
生豈有異術乎？蓋其平日接受無早暮，下  
情盡達處，先已握其機矣。○先生每言理  
會一事時，血脉骨髓都在自家手中，然我  
此中却是箇閒閒散散，不理會事的人，不  
陷事中，真可謂當官應事之法。雖然，此法

可易至哉

楊簡

楊慈湖先生簡乾道中主富陽簿簿於邑號閒  
冷簡誠以接物衆畏信之相戒奉約束惟謹走  
吏持片紙入市可質數千初富陽民不知學簡  
至兩月無一士來見怪問之左右對曰是邑多  
商不利爲士簡惻然卽日白宰詣學講習文風  
遂振爲紹興府司理犴狴必躬臨端嘿以聽使  
自吐露猾吏僅行文案莫敢舞越府吏觸怒帥

送獄勘之。簡曰：無罪。令勘平日。簡曰：吏過誣。免。今日實無罪，必摘往事置之法。某不敢奉命。帥大怒。簡歎曰：是尚可爲乎？歸取告身納之，爭愈力，知不可屈，遂已。每謂白事上司，必從容陳述，有不合，卽追思，思之而審，堅守無所撓。或大碍不見聽，則決去而已。改知樂平縣，學宮逼陋，簡撤新之，首登講席。邑之大夫士咸會，誨之曰：國家設學校，欲教養真賢，使進於科目，非具文而已。然士之應科目，處學校，往往謂取經義詩

賦論策耳，善爲是，雖士行掃盡，無害於高科也。何以維持此心，大失國家教養之意。楊石二少年囂健，虛喝官府，異時長吏，利爲鷹犬，挾借聲焰，莫可誰何。簡灼見姦狀，寘獄中，因論利害，咸感悟，願自贖。繇是邑人以訟爲恥，夜無盜警，路不拾遺。召爲國子博士，二人率衆相隨出境外。呼曰：楊父泣拜，戀戀不忍離。及出知溫州，首訪賢者禮致之，示標表，崇孝養，明宗族，相恤之令。首行鄉約，效周官書敬敏任恤之類，書善不書

惡詞訴類局於日分難遽達簡架大鑠哉  
令訴者自鳴鳴卽引問立剖決之每受詞採訪  
縣官賢否言人人同乃行黜陟有私離者五百  
爲群過境內分司幹官檄永嘉尉及水寨兵捕  
之巡尉僂跳易事不白郡先生驚曰是可輕動  
乎賊徒五百合家族何翅二千人拒捕相殺傷  
變在頃刻萬一召亂貽朝廷憂且兵之節制在  
郡將遣節度是不嚴天子命應斬建旗立巡尉  
庭下召削手兩行來立數其罪命斬之郡官交



進爲致悔罪意良久得釋因奏罷分司時有訟

售產於寓官而負其直同訴者十八人卽命吏

籌計官帑人給之袖衆詞卽其家語曰某知公

力之每第委曲近人乃爾

必無是是在幹者寓官爲動不得已吐實簡曰

幸出幹者屬吏寓官靳之竟追斷償所負勢家

第宅障官河卽日撤之城中謹誦名楊公河簡

在郡廉檢自將奉養菲薄嘗曰吾敢以赤子膏

血自肥乎一名卿治第甚華中有堂尤偉麗簡

往謁特延之別館猶愧發顏間簡去十餘歲邦

人去思未艾。謂當時真有三代遺風。金人太饒  
來歸者。日以數千萬計。邊吏臨淮水射之。簡蹙  
然曰。得土地易。得人心難。薄海內外。皆吾赤子。  
中土故民。出塗炭。投慈父母。顧斬斗升粟而迎  
殺之。斬脫死。乃速得死。豈綏四方之道。乃設法  
安插。

慈湖之學。人以其高曠而不可及。乃蒞職  
所至。懃懇周密若此。臨淮之射。深切軫惻  
萬物一體之念。皆於蹙然間見之矣。

黃幹

黃幹初補將仕郎監台州酒務歷通判安豐軍  
淮西帥司檄鞠和州獄獄故以疑未決幹一夜  
夢井中有人果於廢井得尸尋知漢陽軍值歲  
饑荒政具舉民大感悅卽郡治後鳳棲山爲屋  
館四方士立周程游朱四先生祠以病乞祠主  
管武夷冲祐觀尋起知安慶府至則金人破光  
山乃請於朝創郡城以備戰守不俟報而興役  
分十二料先自築計其工費若干然後委官吏

寓公士人分料主之役者更番暑月月休六日  
日休一時至秋漸殺其半幹日以五鼓坐於堂  
使若官入聽命以一日成算授之受命畢乃治  
府事會僚佐講究邊防利病次則督視城役晚  
入書院講論經史築城之杵用錢監未鑄之鐵  
事畢還之及城成會上元日張燈士民扶老挈  
幼往來不絕有老嫗百歲二子輿之諸孫從至  
府致謝幹禮之命具酒炙且勞以金帛嫗曰老  
婦之來爲一郡生靈謝耳太守之賜非所冀也

不受而去後金人破黃州沙窩諸關淮東西皆震獨安慶安堵如故繼而淋漓餘月巨浸暴至城屹然無虞舒人德之相謂曰不殘於寇不縮於水生汝者黃父也

以夢決獄涉於靈異思之不得鬼神通之驗矣分料計工先自舉築繼以委人工役無所容其虛冒儒者之政其利國利民也如此

真德秀

真文忠公德秀初仕判南劍州嘉定中累進禮部郎初爲江東轉運副使江東旱蝗廣德太平爲甚德秀遂與留守憲司分所部九郡大講荒政而自領廣德太平以便宜發廩百姓數千人送至郊外指道傍叢冢泣曰此皆往歲饑死者微公我輩已相隨入此矣先是都司薛拯每詣德秀迂儒試以事必敗至是政譽日聞因倡言旱傷本輕監司好名賑贍太過以此憾德秀秀上章自明朝廷乃悟遷知泉州前此番舶畏苛

征至者歲不三四。德秀首寬之。至首驟增三十艘。輸租令民自槩。聽訟惟揭示姓名。人自詣州。泉多大家。爲閭里患。痛繩之。有訟田者。至焚其券。不敢爭。改知潭州。首以四事勵僚屬。仍爲民去十害。理宗時。復起知泉州。迎者塞路。諸邑二稅。嘗預借至六七年。德秀入境。首禁預借。有累月不解一錢者。郡計赤立。不可爲。或咎寬恤太驟。德秀謂民困如此。寧身代其苦。決訟自卯至申。未已。有勸齋養精神者。德秀曰。郡敝無力惠。

民僅有政平訟理事當勉耳海寇縱橫次第擒殄暇日延聘耆儒躬臨講習以教郡之秀士再守長沙嘗集十二邑宰湘江議事以詩勗之曰從來守令與斯民本是同胞一體親旣以脂膏供汝祿須知痛痒切吾身此邦素號唐朝古我輩當如漢吏循今日湘亭一杯酒便煩散作十分春長沙人至今祀之

一意恤民是賢太守事然郡事有可自繇者如政平訟理是也有不可自繇者如預



借之類是也、預借之害、甚於加賦、禁之誠是、但郡計赤立之時、何以措手、

魏了翁

魏了翁開禧中、差知漢州、漢號爲繁劇、了翁以化民善俗爲治、首蠲積逋二十餘萬、嚴戶婚交計之禁、復爲文諭以厚倫止訟、民敬奉條教、不敢犯、改知眉州、眉俗習法令、持吏短長、聞了翁至、爭試以事、乃尊禮耆耆、簡拔俊秀、朔望詣學宮、親爲誘掖、指授行鄉飲酒禮、以示教化、復甚

顧堰築江鄉館利民之事知無不爲士論大服風俗一變及遷轉運判官職吏姦詢民瘼舉劾不避權右風采肅然遷寧闕守了翁行郡事卽具奏乞脩城郭備不虞廷議靳其費了翁增埤浚隍如待敵至者後一年潰卒攻掠郡縣知其有備不敢逞人始服其先見理宗卽位史彌遠惡了翁不附已會有詆其欺世盜名者謫居靖州築鶴山書院以待來學者民有爭訟惟閉戶自咎蠻夷化之爲立祠後起擢潼州路安撫使

知瀘州、大藩控制邊面二千里、而武備日弛、城郭頽塌、了翁乃葺樓櫓、增置器械、申嚴軍伍之律、興學校、剏復社倉、義塚、養濟院、居數月、百廢具舉、

鶴山先生所至、首先武備、增埤浚隄、如朝不及夕、亦所處之時應然、可見真儒之治、定非迂遠、

李方予

李方予性端謹、純篤、初見朱熹、謂曰、觀公爲人、

自是寡過、但寬大中要規矩、和緩中要果決、遂以果名齋、入太學、廷對擢第三、調泉州觀察推官、守真德秀以師友禮之、故事秩滿、必先通書廟堂、乃除、方予曰、通書是求也、丞相史彌遠聞之、怒、踰年始除國子錄、無何、將選入宮僚、而方予不少貶、以求合、或告史彌遠曰、此真德秀黨也、使臺臣劾罷之、方予語人曰、吾於學問雖未能周盡、然幸於大本有見處、此心常覺泰然、不爲物欲所漬爾。

通書便嫌於求、今之求者、異乎方子、

劉清之

劉清之初授建德縣主簿、請於州、俾民自實其  
戶、賦平訟息、調萬安縣丞、時江右大祲、郡檄視  
旱、徒步阡陌、覈實蠲除、州議減常平米直、清之  
曰、此惠不過三十里內耳、外鄉遠民、勢豈能來、  
乃均境內之地爲八、俾有粟者、分賑其鄉、官爲  
主之、規畫防閑、所全活甚衆、後除通判鄂州、鄂  
俗計利而尚鬼家貧子壯則出贅、尤謹奉大洪

山祠病者不藥而聽於巫、歿則火葬之、清之皆力爲禁、先是郡節厨傳、以專常平刑獄使者、月一會集、互致折餽、清之嘆曰、此何時也、而以酒食貨賄爲勤哉、事上官惟究心所職、無負於民足矣、清之自常祿外、悉歸公帑、以佐經用、至之日、兵無糧、官無俸、上供送使俱莫備、已而郡計漸裕、嘗作諭民書一編、首言畏天、積善、勤力、務本、農工商賈皆有勸教、詞意簡直易從、邦人家有其書、訟庭日清、

子澄自謂生平學問無慮可澄似於透脫  
見地人而吏治無不周詳曲當其分賑其  
經用皆實實匡濟之才

胡朝穎

胡朝穎歷武昌令通判嘉興時宰相鄭清之家  
奴暴橫朝穎執置諸法移書謝云以天子之命  
官撻宰相之奴僕罪當避位清之得書以聞帝  
喜曰得一佳士矣除守岳州兼河北提刑至官  
謂其地爲東南上游非諸生坐嘯之地乃精士

類厚公蓄嘗以道學不明詞章隘陋爲歎慨然  
自信其獨見而躬行之諸生及門者皆超然拔  
於流俗之表

懲一豪奴何必避位然反以此見知於人  
主則存乎所遇矣

### 方克勤

方克勤少從鄉先達學窮研力索至忘寢食元  
季亂却穀隱山谷中國初被徵辭索之急起  
家爲濟寧府知府錫冠帶寵行比至官首爲書



一通懸惠衢諭天子愛養元元之意民卽有不  
樂聽詣府自言禁隸卒誰何之引耆耄坐語訊  
得失郡學官缺孔子廟堂頽圯聘賢者爲師撤  
浮屠氏以葺廟社各立學學凡數百區學子繫  
籍者至千人始有詔民開廢閒田者聽閔三歲  
乃稅吏徼近功不俟期輒歛之復以田定科繇  
民益惰且散克勤奉詔益勸課田以增闢與民  
約列丁產爲上中下三等等析爲三有徵發視  
差等書吏不得並緣爲奸歲暮轉戎衣於燕時

令役民舟者有誅他郡以牛車從事天雨雪牛  
僵死於道民破產十八九民請以舟僦役克勤  
曰吾知從民便而已抵法非所憚也載以舟行  
省義之不問郡城壞故事以兵完築指揮使倚  
與援扶貴人爲重五六月輒聚民萬餘人治之  
民不得田克勤憤曰民困不救烏用二千石爲  
密聞之中書卽日詔罷役民驩呼而散鄰境蝗  
卽省愆輟食稽首籲天迨夜聞空中薨薨聲燭  
之乃飛蝗蔽天而過郡獨有年民有獄訟大者

咎辱小事諭遣之不留案牘庶獄日省錄無久淹文未具時作糜遍食之每秋成卽移文與民期日輸倉粟聽民槩斛不遣吏而稅常先登江浙二行省歲運糧百萬詣濟寧水陸千里撫如部民不令有纖毫怨懟言之朝蠲其耗每徵發下信符致民不得無故相勾攝民得並力耕桑襁負來歸者相望初赴官戶僅三萬稅七萬石餘三年後戶增至六萬稅十四萬有奇二州二十縣家給人足野無流殍諸社稷山川祠壇壝

器服咸飾無所闕修驛傳於城南門庭堂弘敞  
踰昔皆料材役工於農隙爲之民不知勞郡故  
以葦困峙糧火屢爲災教民爲陶瓦屋百餘間  
申戒火令編民居爲什伍遞相救恤遂不復火  
會大師十萬往填燕官吏索糧芻相輾轉於前  
克勤依序酬決無不如意一軍稱能永嘉侯朱  
亮祖將舟師北征水涸舟膠不可動勤民夫五  
千決河以軍法申督克勤不忍夜泣禱於天天  
忽大雨水起數尺而去克勤爲政以風俗爲急

以○德○化○爲○本○郡○最○煩○劇○民○孚○化○久○益○無○事○終○日○  
衣○冠○坐○堂○上○召○諸○吏○授○詩○書○法○律○性○不○喜○近○名○  
常○自○誦○曰○近○名○必○立○威○立○威○必○害○人○吾○不○忍○爲○  
也○府○庭○不○陳○桎○械○縣○韋○鞭○楹○間○示○無○刑○罰○奏○六○  
歲○績○績○最○錫○燕○賞○還○郡○上○召○見○獎○諭○曰○政○成○當○  
顯○用○卿○尋○爲○屬○吏○楊○貢○所○構○誣○詔○御○史○廉○按○御○  
史○憚○失○出○峻○治○之○以○用○倉○中○炭○葦○就○逮○民○號○呼○  
填○道○隨○行○百○餘○里○者○數○千○人○子○孝○孺○上○書○政○府○  
請○以○身○贖○父○罪○不○報○

方公始終以天子愛養元元之意加惠一郡勤勤懇懇如治家然風俗爲急德化爲本公雖不言儒而國朝之儒治定無踰此

### 王陽明

王陽明先生守仁起知廬陵爲政不事威刑惟以開導人心爲本蒞任初首詢里役察鄉里貧富姦良之實而低昂之獄牒盈庭不卽斷射稽國初舊制慎選里正三老申明亭使之委曲勸諭民胥悔勝氣囂訟至有涕泣而歸者繇是閭

圖日清、在縣七閏月、遺告示十有六、大抵諄諄  
慰父老使教子弟、毋令蕩僻、城中失火、身禱  
風、以血襪火而火卽滅、因使城中開火巷、定水  
次兌運、絕鎮守橫徵、杜神會之借辦、立保甲以  
弭盜、清驛遞以延賓旅、至今數十年、猶踵行之  
化民善俗、自是真儒分內事、惟是平定逆  
藩之功、大都得於吉郡賢豪之助、然此諸  
賢皆七月廬陵令時所識、拔而聯屬之者、  
卽此一種法眼、那可易得、